



Sesida dals

Communitgà ils

Protocol nr.

20 d'avust 2019

21 d'avust 2019

579

## **Incumbensa Kappeler**

concernent ina plattafurma chantunala per cumpensar CO<sub>2</sub>

### **Resposta da la regenza**

L'emprim vali da fixar che cumpensar n'è betg il medem sco reducir u evitar. Per cuntanscher la finamira primara, pia da reducir u d'evitar las emissiuns da CO<sub>2</sub> è la regenza sa declarada pronta d'acceptar l'incumbensa Wilhelm (Green Deal per il Grischun: nizzegiar la protecziun dal clima sco schanza) ch'è vegnida acceptada dal cussegl grond cun gronda maioritad en ina furma revedida en la sessiun da zercladur 2019. En quest senn han mesiras per proteger il clima ina gronda prioritad per la regenza.

Dapi l'onn 2013 è francada en la lescha naziunala davart il CO<sub>2</sub> in'obligaziun da cumpensaziun per ils importaders da carburants fossils. Quels vegnan obligads da reducir ina part da las emissiuns chaschunadas dal traffic en Svizra cun mesiras (uschenumnads "projects da cumpensaziun") en la dimensiun da lur obligaziun da cumpensaziun. Quests projects da cumpensaziun resp. las reducziuns da las emissiuns che resultan dad els ston ademplir dus criteris centrals: Senza il retgav da la vendita da las attestaziuns sto il project da cumpensaziun esser nunrentabel (criteri da l'addizionalitad concernent las investiziuns) ed el sto effectuar cumprodamain ina reducziun supplementara da las emissiuns che po vegnir mesirada fisicalmain (criteri da l'addizionalitad concernent la reducziun da las emissiuns). L'observaziun sco er la controlla da quests criteris chaschunan fitg blera lavur tant per ils svilupaders da projects sco er per las autoritads executivas. Quai sa mussa en la media dal pretsch per ina tonna CO<sub>2</sub> cumpensada (var 100 francs) ed en la lavur d'execuziun da vart da la confederaziun. L'installaziun d'ina execuziun correspudenta ha durà plirs onns tar la confederaziun ed ils custs da personal èn considerabels cun var 10 personas en l'administraziun federala, cun l'accreditaziun da var 10 posts da controlla e cun la gestiun da la banca da datas per administrar ils projects da cumpensaziun naziunals e las reducziuns da las emissiuns.

Ultra da l'obligaziun da cumpensaziun reglada per lescha exista la cumpensaziun facultativa d'emissiuns da CO<sub>2</sub>, enconuschenta en spezial en connex cun viadis per

aviun. Quella po vegnir liquidada gia oz en moda favuraivla areguard il pretsch e cun pouca lavur sur plattafurmas d'internet existentas. Questas cumpensaziuns èn favuraivlas, perquai ch'i sa tracta d'ina vart da la cumpra da certificats per reducir emissions da projects da reducziun da l'exteriur e perquai che la controlla dals projects da reducziun esters inclusiv la redacziun e l'administraziun dals certificats da clima vegn garantida da l'autra vart tras la ONU. Questas cumpensaziuns facultativas prenda l'incumbensa Kappeler en mira essend ch'ella na vuless betg far las reducziuns da las emissions a l'exteriur, mabain entaifer il chantun ed a favur da l'economia grischuna.

Er en il sector da las cumpensaziuns facultativas èn l'installaziun e la gestiun d'ina plattafurma da cumpensaziun colliadas cun ina lavur considerabla. Ina plattafurma da cumpensaziun correspundenta na duess pervia da quai betg vegnir realisada dal chantun Grischun en atgna reschia, mabain en collavuraziun cun auters chantuns. En il chantun Friburg exista dapi l'onn 2018 ina plattafurma da la fundaziun "Carbon Fri" che vegn purtada da la banca chantunala friburgaisa, da la chombra da commerzi e d'industria sco er da l'interpresa per climate services. La fundaziun certitgescha process, products e servetschs d'interpresas en il chantun Friburg sut la premissa, che las emissions da CO<sub>2</sub> vegnian reducidas e che per las emissions da CO<sub>2</sub> restantas vegnia pajada a la fundaziun ina contribuziun tranter 10 e 20 francs per tonna CO<sub>2</sub>. Ils daners che vegnan rimnads uschia returnan alura, dirigids da la fundaziun, en l'economia intrachantunala a favur da projects per proteger il clima. L'avrigl da quest onn ha la regenza dal chantun Friburg surpiglià in postulat che extenda ils servetschs che vegnan purschids da la fundaziun er sin las burgaisas ed ils burgais dal chantun Friburg.

L'installaziun e la gestiun d'ina plattafurma da cumpensaziun en atgna reschia e tras l'administraziun chantunala n'è betg da beneventar. Percunter para in proceder ensemble cun auters chantuns, che sa basa sin las lavurs preparatoricas dal chantun Friburg, d'esser degn da vegnir examinà.

Sa basond sin questas consideraziuns propona la regenza al cussegl grond da midar questa incumbensa sco suonda:

La regenza examinescha, sche u sut tge circumstanzas ch'ina plattafurma chantunala da cumpensaziun da CO<sub>2</sub> pudess vegnir realisada en collavuraziun cun auters chantuns.



En num da la Regenza

Il president:

Il chancelier:

Dr. Jon Domenic Parolini

Daniel Spadin